



ՀՀ ՓԱՍՏԱԲԱՆՆԵՐԻ ՊԱԼԱՏԻ ԱՆԴԱՄ

Փաստաբան Գևորգ Դավթյան

Արտոնագիր թիվ 520

ՀՀ, ք. Երևան, Մալաթիա-Սեբաստիա, Հաղթանակ թաղամաս, 61 տեղամաս, 4-րդ տուն,
հեռ. 093 88-13-14

14.01.2017թ. թիվ 14/01

ՀՀ Փաստաբանների Պալատի

հաշվիչ հանձնաժողովի նախագահին

Հասցե՝ Հայաստան, 0010, ք. Երևան, փ. Զաքիյան 2

Ա Ռ Ա Ջ Ա Ր Կ

Հունիս 11-ը փաստաբանի օր սահմանելու մասին

Հիմք ընդունելով ՀՀ փաստաբանների պալատի նախագահի 21.12.2016թ. թիվ 500-Լ որոշումը և վերջինովս հաստատված “Փաստաբանի օր” սահմանելու հարցով փաստաբանների առաջարկներն ընդունելու մասին կարգը, ներկայացնում եմ Հունիսի 11-ը փաստաբանի օր սահմանելու առաջարկը և դրա հիմնավորումները.

2012թ.-ի հունիսի 11-ին ՀՀ փաստաբանների կողմից կազմակերպվեց բողոքի ակցիա՝ գործադուլ, որով փաստաբաններն իրենց բողոքն էին արտահայտում ՀՀ դատական համակարգում, դատախազությունում և այլ իրավապահ կառույցներում առկա անարդարադատության դեմ: Այն հասցեագրված էր ոչ միայն համապատասխան կառույցներին, այլ ՀՀ վճռաբեկ դատարանին, քանի որ վերջինս իր գործունեությամբ կարող է արմատախիլ անել իրավական դաշտում առկա արատավոր երևույթները, ինչը, ցավոք, չէր անում: Այդ ակցիային միացան այդ ժամանակվա գործող փաստաբանների գրեթե մեծամասնությունը՝ մոտ 600 և ավել փաստաբան: Այդ օրը բազմաթիվ փաստաբաններ հավաքվեցին Արմենիա Մարիոթ հյուրանոցում՝ հայտարարելով, որ ի նշան ներկայիս իրավական, դատական և մասնավորապես՝ վճռաբեկ դատարանում առկա բազմաթիվ ոչ իրավաչափ գործողությունների, որևէ մասնագիտական գործողություն չեն իրականացնելու: Գործադուլին ակտիվ մասնակցություն էին ցուցաբերել բազմաթիվ ճանաչված և ակտիվ փաստաբաններ, այդ թվում՝ պալատի ներկայիս նախագահ Արա Զոհրաբյանը և այդ ժամանակվա Պալատի նախագահ Ռուբեն Սահակյանը:

Նմանատիպ ակցիա էր կազմակերպվել նաև դրանից մեկ տարի առաջ՝ 2011թ. հուլիսի 7-ին, Պալատի նախագահ Ռուբեն Սահակյանի ակտիվ մասնակցությամբ, որտեղ բողոքի հիմքը հանդիսացել էր այն, որ ԱԽ-ն որոշել էր դիմել ՀՀ նախագահին, Ավան և Նոր-Նորք վարչական շրջանների դատարանի դատավոր Սամվել Մնացականյանի լիազորությունները դադարեցնելու միջնորդությամբ այն հիմնավորմամբ, որ դատավորը չի պատճառարանել իր որոշումը՝ կալանքը

գրավով փոխարինելու վերաբերյալ, որը փաստաբանների գնահատմամբ խտրական և վտանգավոր նախագգուշացում էր՝ ուղղված մյուս դատավորներին նման որոշումների դեպքում պատասխանատվության անխուսափելիության մասին:

Իրավական համակարգում առկա անարդարադատության դեմ ուղղված պահանջներով և ամբողջ պետական համակարգին տիրող անարդարադատ վիճակը ներկայացնելու նպատակով նմանատիպ ևս մեկ ակցա, սակայն երկօրյա տևողությամբ, մոտ 200 և ավելի փաստաբանների մասնակցությամբ, կազմակերպվեց 2013թ. հունիսի 10-ին և 11-ին:

Այդ ակցիաներում փաստաբանների ներկայացված արդարամիտ պահանջներին հաջորդել և նախորդել են մի շարք հարցազրույցներ, մամլո ասուլիսներ, հաղորդագրություններ, հեռուստահաղորդումներ, հրապարակումներ, որոնք հասանելի էին դարձել ամբողջ հասարակությանը, պետական համակարգին, այդ թվում ՀՀ նախագահին, ինչի արդյունքում համապատասխան արձագանքները ևս չուշացան: Հատկաշահական այն է, որ թեև այդ գործադուլներին փաստաբանական համայնքը 100 տոկոսով ներկայացված չէր, սակայն փաստաբաններից չգտնվեց գեթ մեկը, որը համամիտ չլիներ իրավական համակարգում առկա անարդարադատության առկայության և դրա դեմ ուղղված պայքարում լուծումներ ձեռնարկելուն:

Ինչու հենց հիշատակված ակցիաներից հունիս 11-ը փաստաբանի օր, քանի որ 2012թ. այդ օրը փաստաբանական համայնքը ներկայացված էր իր առավելագույն կազմով և այդ օրվանից համայնքը իր կոնկրետ պահանջները ներկայացնելով, սկիզբ դրեց իրավական համակարգում առկա անարդարադատության դեմ տարվող պայքարում իր միասնականության ձևավորմանը, որը կմնա մեր պատմության մեջ՝ որպես փաստաբանական համայնքի միասնական պայքարի վերաճննդի օր, ինչը ոչ այլ ինչ է, քան իրավական պետության կայացման հզոր ներուժը: Այն, որ փաստաբանները ցանկացած իրավիճակում պետք է լինեն իրենց վստահորդների շահերից, ապա հենց հիշատակված ակցիաներով միասնական ձևով ի ցույց է դրվել վստահորդների շահերի պաշտպանության ևս մեկ միջոց, որը բխել է երկրում առկա ընդհանուր և համակարգային տիրող արդարադատության վատթարացի վիճակից: Նման օրը, ըստ էության, անարդարության դեմ պայքարի խորհրդանիշ կարող է լինել, որի հիշատակման դեպքում ի ցույց կդրվի նախորդ ժամանակահատվածի տիրող իրավիճակը, ինչն էլ կնպաստի ապագայի բարելավմանը:

Որպես լրացում պետք է նշվի նաև, որ հիշատակված ակցիաները կազմակերպվել են ամռանը, գրեթե նույն ժամանակահատվածներում՝ հունիս-հուլիս ամիսներին, ինչով պայմանավորված հունիսի 11 ը, որպես “Փաստաբանի օր” նշելը, անմոռաց հետք է թողնելու ինչպես հիշատակված բոլոր ակցիաներում բարձրացված պահանջները չմոռանալուն, այնպես էլ կապակցված առկա և առաջացող խնդիրները լուծելուն: Ընդ որում, եղանակային պայմանները ի նպաստ են՝ այդ օրը էլ ավելի տոնական նշելու, բացօթյա միջոցառումներ կազմակերպելու, անգամ տարբեր տարածաշրջաններ այցելելու կամ այլ ձևաչափով այն կազմակերպելու համար:

Այսպիսով, հիմք ընդունելով վերոգրյալը՝

ԱՌԱՋԱՐԿՈՒՄ ԵՄ յուրաքանչյուր տարվա համար “Փաստաբանի օր” սահմանել հունիսի 11-ը, որպես փաստաբանական համայնքի կամ փաստաբանների միասնականության և վերաճննդի օր:

Հարգանքով՝

Փաստաբան

Գևորգ Դավթյան